

Li Hu li Quixtz'iba li San Pablo re laj Filemón

Xq'uebal xsahileb xch'ol

¹ Laj Pablo. Cuanquin chi prexil sa' xc'aba' li Jesucristo. Cuocho ben li kaherman Timoteo yoquin chixtz'ibanquil li hu a'in, at Filemón. Laat kech aj c'anjelil chiru li Cristo ut rarocat kaban.

² Li hu a'in re ajcui' lix Apia, li kech aj pabanelil ut reheb ajcui' laj pabanel li neque'xch'utub rib sa' la cuochoch chixlok'oninquil li Dios, ut re ajcui' laj Arquipo li kech aj pabanelil. A'an li qui-ochbenin chak ke sa' li c'anjel chixyebal resil li colba-ib.

³ Chicuan k taxak eriq'uin li usilal ut li tukuquilal li naxq'ue chak ke li Dios li kaYucua' ut li naxq'ue li Kacua' Jesucristo.

Tz'akal re ru lix pabal laj Filemón

⁴ Junelic ninbantioxi chiru lin Dios nak nintjoc chacuix.

⁵ Ninbantioxi chiru li Dios nak nacuabi resil nak nacapab chi tz'akal li Jesucristo ut ninbantioxi chiru nak nacaraheb chixjunileb laj pabanel.

⁶ Ut nintz'ama ajcui' chiru li Dios nak tatxtenk'a re nak tac'utun k chanru la pabal. Ut nak te'ril li rusilal li Jesucristo cuan acuiq'uin, te'q'uik sa' xpabaleb.

⁷ At inherman, c'ajo' nak nasaho' ut nac'ojla inch'ol nak xcuabi resil chanru nak nacaraheb laj pabanel ut nacaq'ue xcacuical xch'oleb.

Laj Pablo quixtz'ama chiru laj Filemón nak tix-cuy xmaq laj Onésimo

⁸ Anakcuan nacuj xtz'amanquil jun usilal chācuu. Lain la herman sa' xc'aba' li Cristo ut cuan incuanquil chixyebal ācue c'a'ru tabanu.

⁹ Abanan inc'a' tinmin ācuu chixbanunquil. Tintz'ama ban li usilal chācuu xban nak nakara kib. Lain ac xintix ut cuanquin chi prexil sa' xc'aba' li Cristo.

¹⁰ Li usilal nintz'ama chācuu, a'an chirix laj Onésimo. Chanchan li cualal chicuu nak cuan xban nak chicuu quixpab li Jesucristo nak cuanquin chi prexil.

¹¹ Junxil laj Onésimo inc'a' quic'anjelac chi us chācuu. Abanan anakcuan chābil aj c'anjel chic chācuu laāt ut chicuu ajcui' lain.

¹² Tintakla cui'chic ācuiq'uin ut nak tāc'ul a'an, chanchan ajcui' nak tināc'ul lain.

¹³ Lain xcuj raj nak xcana ta cuiq'uin. Naru raj tāc'anjelac chicuu chok' ācuūchil laāt nak cuanquin chi prexil xban xyebal resil li colba-ib.

¹⁴ Abanan inc'a' nacuj xminbal ācuu chixbanunquil li usilal a'in. Nacuj ban nak tabanu a'an chi anchal āch'ol. Jo'can nak māc'a' xinbanu chi inc'a' ta tanau laāt.

¹⁵ Cuan xyalal nak qui-el jarubak cutan ācuiq'uin. Mare lix yalal a'an nak quijala lix yu'am ut anakcuan tācuank ācuiq'uin chi junelic.

¹⁶ Anakcuan mācua' chic jo' lok'bil moş nak tācuank ācuiq'uin. Anakcuan k'axal lok' chic chiru junak moş xban nak anakcuan aherman chic sa' xc'aba' li Jesucristo. Raro inban lain, ut laāt k'axal cui'chic nak tara xban nak āmoş ut

aherman ajcui' sa' xc'aba' li Kacua'.

¹⁷ Laat nacanau nak lain acuech aj c'anjelil. Jo'can nak chac'ulak laj Onésimo jo' nak niquinac'ul lain.

¹⁸ Ut cui cuan junak xmac chacuu, chaq'uehak sa' inben lain. Ut cui cuan xc'as acuiq'uin, lain tintoj lix c'as chacuu.

¹⁹ Lain laj Pablo. Ut riq'uin cuuk' yoquin chixtz'ibanquil li atin a'in. Lain tintojok re chacuu. Ut lain naru raj tinye acue nak k'axal cui'chic cuan la c'as chicuu. Laat cuan la yu'am chi junelic xban nak lain xinch'olob xyalal chacuu.

²⁰ Jo'can ut herman, banu li usilal a'in sa' xc'aba' li Kacua'. Ut li usilal nintz'ama chacuu, a'an nak tac'ul laj Onésimo sa' xyalal. Chac'ojob taxak inch'ol xban nak lao aj pabanel ut kacomon kib sa' xc'aba' li Jesucristo.

²¹ Nintz'ibac acuiq'uin xban nak ninnau chi yal nak tabanu li usilal cue. Ut ninnau ajcui' nak li tabanu, a'an k'axal cui'chic nabal chiru li nintz'ama chacuu.

²² Ut nintz'ama ajcui' chacuu nak tacauresi li cuochochnal. Yoquin chixyo'oninquil nak tinxic cui'chic eriq'uin jo' yoquex chixtz'amanquil chiru li Dios.

Eb laj pabanel neque'xtakla xsahil xch'ol laj Filemón

²³ Laj Epafras cuochben chi prexil sa' xc'aba' li Jesucristo. A'an naxtakla ajcui' xsahil ach'ol.

²⁴ Ut neque'xtakla ajcui' xsahil ach'ol laj Marcos, laj Aristarco, laj Demas ut laj Lucas. Cuochbened a'an nak yoco chi c'anjelac chiru li Jesucristo.

²⁵ A' taxak li rusilal li Kacua' Jesucristo chicuank
eriq'uin. Jo'can taxak.

Li Santil hu **Bible in Q'eqchi' (GT:kek:Q'eqchi')**

copyright © 2000 Wycliffe Bible Translators, Inc.

Language: Q'eqchi'

Translation by: Wycliffe Bible Translators, Inc.

Q'eqchi' [kek], Guatemala

Copyright Information

© 2000, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Q'eqchi'

© 2000, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

f1b065df-5ef5-5c8a-a273-af2b9aefff55